

摛藻堂四庫全書薈要

史部

欽定四庫全書

卷九千七百四十

史部

經義考卷十一

翰林院檢討朱彝尊撰

易十

裴氏秀易論

佚

文章敘錄秀字季彥年二十五為黃門侍郎累遷散
騎常侍尚書僕射令光祿大夫咸熙中封廣川侯晉

室受禪進左光祿大夫改封鉅鹿公遷司空著易及
樂論又畫地圖十八篇傳行於世

衛氏 瑞 易義

佚

晉書衛瓘字伯玉河東安邑人太康初司空侍中尚
書令惠帝即位加太保錄尚書事

王氏 宏 易義

佚

晉書王宏字正中高平人粲從孫泰始初為汲郡太
守遷衛尉河南尹大司農太康中為司隸校尉後為
尚書

陸德明曰宏弼之兄晋大司農贈太常為易義

鄒氏湛
周易統畧

隋志五卷

新舊唐志統論三卷

佚

晉書鄒湛字潤甫南陽新野人仕魏歷通事郎太學

博士太康中為散騎常侍國子祭酒轉少府

劉氏兆周易訓注

佚

晉書劉兆字延世濟南東平人武帝時五辟公府三
徵博士皆不就撰周易訓注以正動二體互通其文
向氏秀周易義

佚

晉書向秀字子期河內懷人為散騎侍郎轉黃門侍

郎散騎常侍

按向氏易文王以之依鄭氏荀氏本作似

阮氏咸周易難答論

唐志二卷

佚

晉書咸字仲容歷仕散騎侍郎出補始平太守

唐書阮長成阮仲容難答

應氏貞明易論

唐志一卷

佚

晉書應貞字吉甫汝南南頓人魏侍中璩之子武帝初置太子中庶子官以貞為之後遷散騎常侍

王氏濟周易義

佚

晉書王濟字武子善易尚長山公主起家拜中書郎累遷侍中出為河南尹尋使白衣領太僕

皇甫氏 謐易解

佚

晉書皇甫謐字士安安定朝郡人有高尚之志以著述為務號玄晏先生

胡一桂曰見正義

阮氏

渾周易論釋文序錄
論作義

隋志二卷

佚

陸德明曰阮渾字長成籍之子晉太子中庶子馮翊

太守為易義

袁氏準周易傳

佚

袁氏世紀準字孝尼著書十餘萬言為周易周官傳及論五經滯義聖人之微言以傳於世

庾氏運易義

佚

陸德明曰庾運字玄度新野人官至尚書為易義

郭氏琦注京氏易

一百卷

佚

冊府元龜郭琦字公偉為著作佐郎注穀梁春秋京
氏易百卷鄉人王游等皆就琦學

徐氏苗周易筮占

七錄五行家二十四卷

佚

晉書徐苗字叔胄高密淳于人與弟賈就博士濟南
宋鈞受業遂為儒宗作五經同異評郡察孝廉州辟
從事治中別駕舉異行公府五辟博士再徵並不就
樂氏肇周易象論

隋志三卷

唐志
一卷

佚

陸德明曰肇字太初泰山人晋太保掾尚書郎為易

論

李氏克周易音

六篇

佚

晉書李克字弘度江夏人辟丞相王導掾轉記室參
軍累遷中書侍郎注尚書及周易音六篇行於世

王氏廙周易注

隋志三卷

殘闕七錄十卷釋文序錄十二卷

佚

晉書王廩字世將丞相導從弟為荊州刺史徵為輔國將軍加散騎常侍進左衛將軍

按王氏易注明辨哲也哲作晰利用侵伐作寢伐繻有衣祫繻作禡見釋文又其注云駁馬能食虎豹取其至健也正義引之又良為徑注云物始改為徑路又震為大塗注云大塗萬物所生太平御覽引之

楊氏 乂 周易卦序論

隋志一卷

新舊唐志同

佚

陸德明曰乂字元舒汝南人晋司徒左長史

王應麟曰御覽嘗引之

按徐堅初學記引乂易卦序論云險而止山
也險而動泉也動靜皆蒙險故曰山

郭氏 璞 周易洞林

隋志五行家三卷

宋志一卷

佚

周易新林

隋志五行家九卷

又卷四

佚

周易林

七錄五行家六卷

佚

易立成林

隋志五行家二卷

佚

周易玄義經

宋志一卷

佚

易斗圖

隋志五行家一卷

佚

易八卦命錄斗內圖

隋志五行家一卷

佚

晉書郭璞字景純河東聞喜人博學有高才而訥於言論好古文奇字妙於陰陽算歷有郭公者客居河東精於卜筮璞從之受業公以青囊中書九卷與之由是遂洞五行天文卜筮之術為著作佐郎遷尚書

郎嬰王敦之禍璞撰前後筮驗六十餘事名為洞林
又抄京費諸家要撮更撰新林十篇卜韻一篇注釋
爾雅別為音義圖譜又注三蒼方言穆天子傳山海
經及楚辭子虛上林賦數十萬言皆傳於世

王廙曰璞之爻筮雖京房管輅不過也

胡一桂曰景純得青囊書遂洞五行天文卜筮之術
嘗撰前後筮驗六十餘事名為洞林斷法用青龍朱
雀勾陳騰蛇白虎玄武六神及太歲諸煞神時日旺

相等推算靈驗無比又抄京費諸家撮要更撰新林十篇卜韻一篇大抵只用卦爻不假文字然雜以說相塋法行符壓勝之術往往流於技藝而易道日以支離卑下矣

按郭氏洞林初學記嘗引之雙湖胡氏撰啟蒙翼傳云世罕有其書從王楚翁才古抄得之則元時此書尚存也洞林之文有三言者如簪非簪釵非釵有四言者如同人之革曰

朱雀西飛白虎東起姦猾銜璧敵人束手占
行得此是謂无咎隨之升曰虎在山右馬過
其左駿為功曹猾為主者垂耳而潛不敢來
下爰升虛邑遂釋魏野豫之小過曰五月晦
日羣魚來入州城寺舍既濟曰小狐汔濟垂
尾累衰初雖偷安終靡所依案卦言之秋吉
春悲又有七言者如否曰乾坤閉塞道消長
虎刑挾鬼法凶亂亂則何時時建寅僵尸交

林血流漂此占行者入塗炭小過之坤曰小過之坤卦不奇雖有卦氣變陽離初見勾陳被牽羈暫過則可羈不宜將見刦追事幾危賴有龍德終无疵遯之姤曰卦象出墓氣家囚變身見絕鬼潛遊爻墓克刑鬼煞俱卜病得此歸蒿邱誰能救之坤上牛若依子色吉之尤賁之豫曰時陰在初卦失度殺陰為刑鬼入墓建未之月難得度消息卦爻為扶助

馮馬之師乃寡嫗自然奇殺宜餐鬼子若恤
之得守故豫之解曰有金之象无火形變見
夜光連月精潛龍在中不游行案卦卜之藻
盤鳴金爻所憑无咎慶驗其占法靡不奇中
所謂林者自為韻語占決之辭猶存左氏傳
遺意

葛氏 洪周易雜占

七錄五行家十卷

佚

晉書葛洪字稚川丹陽句容人元帝為丞相辟為掾以平賊功賜爵關內侯咸和初轉司徒掾遷諮議參軍于寶薦洪才堪國史選為散騎常侍領大著作洪辭不就聞交趾出丹砂求為勾漏令止羅浮山煉丹積年著述不輟

孫氏盛易象妙于見形論

一篇

佚

晉書劉惔傳時孫盛作易象妙于見形論簡文帝使
殷浩難之不能屈惔與抗答辭甚簡至盛理遂屈
本傳孫盛字安國太原中都人桓溫留為參軍從入
閩平洛以功封吳昌縣侯出補長沙太守累遷秘書
監加給事中時殷浩擅名一時與抗論者惟盛而已
盛著易象妙于見形論浩等竟無以難之

袁氏 宏周易畧譜

舊唐書志一卷

新唐書同

佚

晉書袁宏字彥伯謝尚為安西將軍引宏參軍事尋遷大司馬桓溫府記室自吏部郎出為東陽郡

宣氏舒通易象論

陸氏經典序錄作
通知來藏往論

唐志一卷

佚

陸德明曰舒字幼驥陳郡人晉宜城令為通知來藏

往論

張氏 輒易義

佚

陸德明曰輝字義我克梁國人晉侍中平陵亭侯為易
義

杜氏 育 易義

佚

陸德明曰育字方叔襄城人晉國子祭酒為易義

楊氏 琚易義

佚

陸德明曰：瓚不知何許人。晋司徒右長史為易義。

邢氏 融易義

佚

裴氏 藝易義

佚

許氏 適易義

佚

楊氏
藻
易義

佚

陸德明曰邢融裴藻許適楊藻四人不詳何人並為

易義

張氏
軌
易義

佚

崔鴻曰軌字士彥安定烏氏人漢常山王耳十七世

孫涼州刺史謚武穆

按涼武公易得其資斧資作齊云齊斧黃鉞

斧也

張氏璠周易集解

七志十卷隋志八卷殘缺新舊
唐書志仍云十卷

佚

畧論

一卷

佚

陸德明曰璠安定人東晉秘書郎參著作集解十二
卷集鍾會向秀庾運應貞荀暉張輝王宏阮咸阮渾
楊乂王濟衛瓘樂肇鄒湛杜育楊瓚張軌宣舒邢融
裴藻許適楊藻二十二家序云依向秀本七錄云集
二十八家

按璠嘗撰後漢紀三十卷所為易注有云險
而止山也險而動泉也太平御覽引之

干氏寶周易注

隋志十卷

佚

今止存一卷鹽邑志林載之

周易宗塗

七錄四卷

佚

周易文義

隋志一卷

佚

周易問難

二卷

佚

周易玄品

二卷

佚

晉書干寶字令升新蔡人為著作郎平杜弢有功賜爵關內侯領國史補山陰令遷始安太守王導請為

司徒右長史遷散騎常侍為春秋左氏義外傳注周易周官凡數十篇

冊府元龜干寶為散騎常侍領著作撰周易問難二卷周易玄品二卷周易爻義一卷

中興書目寶之易學以卦爻配月或配日時傳諸人事以前世已然之迹證之訓義頗有據

胡一桂曰干寶周易傳十卷復別出爻義一卷宣和四年蔡攸上其書曰其學以卦爻配月或以配日時

傳諸人事而以前世已然之迹證之訓義頗有所據
若大有九三本左傳訛晏享乃與古合房審權亦採
錄之

屠曾序曰吾師草廬先生謂易為五經冠而吳晉英
舊以易解聞吾鹽得兩君子為陸鬱林公紀干常侍
令升第干氏易有註者僅三十餘卦卦惟乾姤六爻
餘止一彖一爻而已要皆自古易類萃中摘抄然亦
義文象數幸衍一脈於蛟潭海澨間不可謂東南易

髓不自令升標揭之也况駿心雄理遣詞英上不遜輔嗣錄之不啻起晉儒而清言也乎

項臯謨跋曰嘗覽羣經于子十卷于今升寶周易注十卷周易宗塗四卷爻義一卷問難二卷玄品二卷有其名亡其書及從里中太史氏後借讀文淵閣書目易類一百十種晋以上惟存京君明傳鄭康成注王輔嗣畧例并注而子夏傳唐張素履偽作不覩有干氏易畧見李鼎祚易傳集解中海鹽樊侯博綜墳

典專精誤述錄示于常侍易解似於載籍節比句櫛
者絕無僅有希世奇書也令升新蔡人徙吳郡海鹽
仕吳為著作郎賜爵閩內侯入晉領國史為散騎常
侍補山陰令遷始安太守所著晉紀總論搜神記具
在志林必悉之凌稚哲萬姓統譜于于二姓俱收令
升于氏宗于犨于氏宗于定國于裔有居海鹽有居
嘉善以博埴為業于窑鎮由是得名是于非于無疑

按隋志周易玄品二卷不注撰人姓名當即

干氏之書又有王氏周易問難二卷疑謁干為王也其文水游至游作薦井牧勿幕勿作為網豐其沛作韋云祭祀之蔽膝為科上稿作燭干氏易已無傳惟散見於陸氏釋文李氏集解近海鹽胡氏編邑志林乃抄撮其僅存者刊行之

殷氏融象不盡意論

一篇

佚

按南史殷景仁傳云陳郡長平人曾祖融晉太常隋志有晉太常卿殷融集十卷

黃氏
穎周易注

隋志四卷

七錄唐志十卷

佚

隋志晉儒林從事黃穎注今殘缺

陸德明曰南海人晉廣州儒林從事

按黃氏易賁于丘園賁作世豚魚作遯魚

宋氏岱周易論

隋志一卷

佚

隋志晋荊州刺史宋岱撰

徐氏邈周易音

隋志一卷

佚

晉書徐邈東莞姑幕人孝武帝招延儒學之士謝安
舉以應選補中書舍人撰正五經音訓學者宗之遷
中書侍郎太子前衛率安帝即位拜驍騎將軍所注
穀梁傳見重於時

陸德明曰邈字仙民

按徐氏於諸經皆有音顏氏家訓書證音辭
篇屢引之

范氏宣周易論難

佚

晉書范宣字宣子陳留人博綜衆書尤善三禮太尉
郗鑑命為主簿詔徵太學博士散騎郎並不就著禮
易論難皆行於世

李氏顥周易卦象數旨

七錄六卷

佚

晉書兒子顥郡舉孝廉亦有文義多所著作

隋志東晉樂安亭侯李顥撰

陸德明曰顥字長林江夏人東晉本郡太守

顧氏
夷等
周易難王輔嗣義

七錄一卷

佚

隋志晉揚州刺史顧夷等撰

李氏
軌
周易音

隋志一卷

佚

隋志東晉尚書郎李軌撰

陸德明曰軌字弘範江夏人東晉祠部郎中都亭侯

宋氏處宗通易論

唐志一卷

佚

李氏悅之易音

佚

晉書悅之字元禮陳郡陽夏人始為謝玄參軍後為
會稽王道子所親愛每勸道子專攬朝權俄而見誅
冊府元龜悅之注繫辭又為易音

沈氏熊周易譜

唐志一卷

佚

周易雜音

唐志三卷

佚

范氏長生周易注

隋志才作蜀十卷

舊唐志同

佚

顏之推曰易有蜀才注江南學士遂不知是何人王儉四部目錄不言姓名題云王弼後人謝晃夏侯該並讀數千卷書皆疑是譙周而李蜀書一名漢之書云姓范名長生自稱蜀才而方以晉渡江後北間傳

記皆名爲偽書不貴省讀故不見也

十六國春秋西山范長生巖居穴處李雄欲迎立爲君而臣之長生固辭曰推步大元五行大會甲子祚鍾于李非吾節也雄即成都王位長生乘素輿詣成都即拜丞相尊曰范賢長生善天文有術數民奉之如神

華陽國志李雄克成都迎范賢爲丞相尊爲天地太師封西山侯賢名長生一名延久又名九重一曰支

字元涪陵丹興人

按釋文引蜀才注大車以載作大輿官有渝
官作館君子以明庶政明作命大耋作咥羸
其角羸作累箕子之明夷箕作其二簋作軌
懲忿窒欲懲作澄壯于頃作仇覓陸夬夬陸
作睦繫于金柅作尼孚乃利用禴作躍在天
成象成作盛知崇禮卑禮作體研幾作擎幾
參天兩地而倚數作竒數

經義考卷十一



總校官庶吉士臣侍朝

校對官檢討臣王鍾健
謄錄監生臣趙之璧

欽定四庫全書叢書要

史部

經義考卷十二

詳校官員外郎臣潘紹觀



欽定四庫全書
薈要卷九千七百四十一

史部

經義考卷十二

翰林院檢討朱彝尊撰

易十一

宋明帝集羣臣講易義疏

隋志十九卷

七錄唐志
二十卷

佚

國子講易議

七錄六卷

佚

宋書帝好讀書愛文義在藩時撰江左以來文章志
又續衛瓘所著論語二卷行於世及即位才學之士
多引進叅侍文籍應對左右於華林園芳堂講周易
常自臨聽

隋志周易義疏宋明帝集羣臣講

張氏 該等羣臣講易疏

唐志二十卷

佚

荀氏柔之易音

佚

陸德明曰頴川頴陰人宋奉朝請

冊府元龜荀柔之注周易繫辭并為易音

按釋文議之而後動荀本作儀之

雷氏次宗周易注

佚

豫章古今記雷次宗字仲倫入廬山事沙門惠遠篤志好學屢徵不起注禮記周易

何氏諶之周易疑通

七錄五卷

佚

阮孝緒曰宋中散大夫何諶之撰

張氏浩周易占

隋志一卷

佚

按南史張暢子浩官至義陽王昶征北諮議參軍融之兄也

徐氏爰易音

佚

陸德明曰爰字季玉琅琊人

竇蒙曰爰字長玉本名瑗避傅亮諱除玉宋大中大

夫

范氏
歆
周易義

隋志一卷

佚

隋志宋陳令范歆撰

齊國學周易講疏

七錄二十六卷

佚

阮孝緒曰齊永明中國學講

祖氏冲之易義

佚

南齊書冲之字文遠范陽蔚人少稽古有機思宋元嘉中用何承天所制厯比古十一家為密冲之以為尚疎乃更造新法孝武令朝士善厯者難之不能屈出為婁縣令謁者僕射永明中轉長水校尉著易老莊義釋論語孝經注九章造綴述數十篇

顧氏歡注王弼易

佚

南齊書歡字景怡吳郡鹽官人篤志好學躬耕誦書
夜則然糠自照母亡廬於墓次遂隱遁不仕於剡天
台山開館聚徒受業者常近百人太祖輔政徵為揚
州主簿及踐阼乃至稱山谷臣請退東歸上賜麈尾
素琴永明元年詔徵為太學博士不就卒於剡山歡
注王弼易二繫學者傳之

沈氏 驛士易經要畧

佚

南齊書驛士字雲禎吳興武康人少好學家貧織簾
讀書口手不息隱居餘干吳差山講經教授從學者
數十百人各營屋宇依止其側昇明末詔徵為奉朝
請永明六年徵為太學博士建武二年徵著作郎永
元二年徵太子舍人並不就著周易兩繫莊子內篇
訓注易經禮記春秋尚書論語孝經喪服老子要畧

數十卷

徐氏伯珍周易問答

七錄一卷

佚

南齊書伯珍字文楚東陽太末人究尋經史遊學者
多依之太守王曇生張淹並加禮辟伯珍應召乃退
如此者凡十二焉吳郡顧歡摘出尚書滯義伯珍訓
答甚有條理永明二年刺史豫章王辟議曹從事不

就卒年八十四

周氏顥周易論

隋志十卷

七錄三
十卷

佚

南史顥字彥倫顥七世孫元徽中為剡令齊高帝輔政為齊殿中郎建元初為文惠太子中軍錄事叅軍轉太子僕兼著作撰起居注遷中書郎轉國子博士

梁武帝周易大義

隋志二十二卷

唐志二十卷

佚

大義疑問

唐志二十卷

佚

周易講疏

隋志三十五卷

佚

梁書高祖文思欽明能事畢究少而篤學洞達儒玄
雖萬幾多務猶卷不輟手然燭側光常至戊夜造制
旨孝經義周易講疏及六十四卦二繫文言序卦等
義樂社義毛詩答問春秋答問尚書大義中庸講疏
孔子正言老子講疏凡二百餘卷並正先儒之迷開
古聖之旨王侯朝臣皆奉表質疑高祖皆為解釋大
同中於臺西立士林館領軍朱异太府卿賀琛舍人
孔子祛等遞相講述於是四方郡國趨學向風

簡文帝易林

十七卷

佚

南史帝博綜羣言善談玄理弘納文章之士賞接無倦嘗於玄圃述武帝所製五經講疏聽者傾朝野所著禮大義二十卷易林十七卷諸非經義不錄並行於世

元帝周易講疏

梁書十卷

佚

南史元帝性愛書籍既患目多不自執卷置讀書左右番次上直晝夜為常畧無休已雖倦卷猶不釋五人各伺一更恒致達曉嘗眠熟大鼾左右有睡讀失次序或偷卷度紙帝必驚覺更令追讀著周易講疏十卷連山三十卷筮經十二卷

顏之推曰元帝在江荆間召置學生親為教授廢寢忘食以夜繼朝至於倦劇愁憤輒以講自解

連山

隋志三十卷

佚

段成式曰梁元帝易連山每卦引歸藏斗圖立成委化集林及焦贛易林

洞林

隋志三卷

佚

元帝自序曰蓋聞玄枵之野鬼方難測朱鳥之舍神
道莫知而緹縵曉披既辨黃鍾之氣靈臺夕望便知
玉井之色復以談乎天者雖絕名言之外存乎我者
還居稱謂之中余幼學星文多歷歲稔海中之書畧
加尋究巫咸之說偏得研求雖紫微迢遞如觀掌握
青龍顯晦易乎窺覽羨門五將亟經玩習韓終六王
常所寶愛至如周王白雉之筮殷人飛燕之卜著名
聚雪非闕地極之山卦有密雲能擁西郊之氣文通

七聖世經三古山陽王氏真解談玄河東郭生纔能
射覆兼而兩之竊自許矣

筮經

梁書十二卷

佚

南平王蕭偉周易幾義

隋志一卷

佚

周易發義

唐志一卷

佚

梁書南平元襄王偉字文達太祖第八子也天監元年封建安郡王十七年改封南平郡王

蕭氏歸周易義記

佚

隋書歸字仁遠梁昭明太子統之孫也父晉周太祖

以為梁主都江陵營薨歸嗣在位二十年梁之臣子
謚曰孝明皇帝著孝經周易義記行於世

蕭氏子政周易義疏

隋志十四卷

佚

冊府元龜蕭子政為都官尚書撰周易義疏十四卷
繫辭義疏三卷

伏氏曼容周易注

七錄八卷

佚

周易集林

唐志十二卷

又一
卷

佚

南史伏曼容字公儀平昌安丘人善老易常云何要
疑易中九事以吾觀之晏了不學也為驃騎行叅軍
宋明帝好周易嘗集朝臣於清暑殿講詔曼容執經

曼容素美風采明帝恒以方嵇叔夜使吳人陸探微
畫叔夜像以賜之齊建元中仕為太子率更令與河
內司馬憲吳郡陸澄共撰喪服建武中拜中散大夫
曼容宅在瓦官寺東施高坐於聽事有賓客輒升高
坐為講說生徒常數十百人梁臺建召拜司徒司馬
出為臨海太守為周易毛詩喪服集解老莊論語義

陶氏 弘景易髓

宋志三卷

佚

南史陶弘景字通明丹陽秣陵人齊高帝作相引為
諸王侍讀除奉朝請永明十年脫朝服挂神武門上
表辭祿詔許之止於句容之句曲山號華陽隱居時
人謂為山中宰相大同二年卒詔贈太中大夫謚貞
白先生

褚氏仲都周易講疏

隋志十六卷

佚

南史仲都錢唐人善周易為當時之冠梁天監中厯位五經博士

按褚氏易錢唐全緩弘立受之正義每引其說其云雷資風而益遠風假雷而增威頗與子夏傳地得水而柔水得地而流辭義相近

何氏隋周易注

隋志十卷

佚

梁書肩字子季廬江灊人師事沛國劉瓍受易及禮記毛詩起家齊秘書郎遷太子舍人出為建安太守遷司徒主簿注易又解禮記於卷背書之謂為隱義累遷左民尚書領驍騎中書令高祖踐阼詔為特進右光祿大夫遣領軍司馬王果宣旨果至肩單衣鹿巾執經卷下牀跪受詔書就席伏讀謂果曰吾年已五十七月食四斗米不盡何容得有宦情果還以報

有敕給白衣尚書祿屑注周易十卷毛詩總集六卷

毛詩隱義六卷禮記隱義二十卷禮答問五十五卷

賀氏 瑤周易講疏

佚

梁書賀瑤字德璉會稽山陰人天監初為太常丞四年初開五館以瑤兼五經博士七年拜步兵校尉領五經博士所著禮易老莊講疏朝廷博義數十篇

朱氏 异集注周易

七錄一百卷

佚

梁書朱异字彥和吳郡錢唐人遍治五經尤明禮易
明山賓表薦异高祖召見使說孝經周易義甚悅之
召直西署俄兼太學博士其年高祖自講孝經使异
執讀累遷右衛將軍時城西開士林館以延學士异
與左丞賀琛遞日述高祖禮記中庸義皇太子又召
異於玄圃講易改加侍中遷左衛將軍遷中領軍侯

景舉兵反以討異為名及寇至文武咸尤之異慙憤
發病卒所撰禮易講疏及儀注文集百餘篇亂中多
亡逸

孔氏子祛續朱异集註周易

一百卷

佚

梁書孔子祛會稽山陰人通經術尤明古文尚書初
為長沙嗣王侍郎兼國子助教累遷散騎侍郎兼中

書通事舍人尋遷步兵校尉高祖撰五經講疏及孔子正言專使子祛簡閱羣書以為義證事竟敕子祛與右衛朱异左丞賀琛於士林館遞日執經累遷通直正員郎舍人如故著尚書義二十卷集注尚書三十卷續朱异集注周易一百卷續何承天集禮論一百五十卷

庾氏說易林

二十卷

佚

南史庾詵字彥寶新野人梁武帝少與詵善及起兵署為平西府記室叅軍詵不屈普通中詔以為黃門侍郎稱疾不起卒諡貞節處士撰易林二十卷

費氏元珪周易注

七錄九卷

佚

隋書梁有齊安叅軍費元珪著周易

陸德明曰蜀人

尹氏濤周易注

七錄六卷

佚

陸德明曰不詳何人

姚氏規周易注

隋志七卷

佚

崔氏 覲周易注

隋志十三卷

佚

周易統例

隋志十卷

佚

馬氏 楷周易文

七錄一卷

佚

沈氏林周易義

七錄三卷

佚

武氏靖周易雜占

七錄八卷

佚

梁氏蕃周易開題義唐志作開題論序疏

經義考

隋志十卷

佚

周易文句義疏

唐志二十卷

佚

周易釋序義

唐志三卷

佚

周氏 弘正 周易義疏

隋志十六卷

佚

陳書周弘正字思行汝南安城人起家梁太學博士累遷國子博士時於城西立士林館弘正居以講授聽者傾朝野焉弘正啟梁武帝周易疑義五十條又請釋乾坤二繫詔答曰知與張譏等三百一十二人釋乾坤文及二繫萬幾小暇試當討論大建五年授

尚書右僕射卒於官諡曰簡子所著周易講疏十六
卷論語疏十一卷孝經疏二卷

顏之推曰梁世老莊周易總謂三玄武宣簡文躬自講
論周弘正奉贊大猷化行郡邑學徒千餘實為盛美

張氏譏
周易義或作
講疏

隋志三十卷

佚

南史張譏字直言清河武城人受學於汝南周弘正

梁武帝嘗於文德殿釋乾坤文言譏與陳郡袁憲等
與焉敕令論議諸儒莫敢先出譏乃整容而進諮詢
循環辭令溫雅帝異之賜裘襦絹云表卿稽古之力
為士林館學士簡文發孝經題譏論議往復甚見嗟
賞陳天嘉中為國子助教後主嗣位為國子博士東
宮學士陳亡入隋終於長安所撰周易義三十卷尚
書義十五卷毛詩義二十卷孝經義八卷論語義二
十卷後主嘗敕就其家寫入秘閣

魯氏弘度易林

隋志三卷

佚

經義考卷十二

欽定四庫全書

經義考卷十三

史部

經義考卷十三

翰林院檢討朱彞尊撰

易
十二

崔氏浩周易注

隋志十卷

佚

北史浩字伯深明元初拜博士祭酒嘗授帝經書明

元好陰陽術數聞浩說易及洪範五行善之因命筮吉凶參觀天文考定疑惑浩總覈天人之際舉其綱紀者數家多有應驗襲爵白馬公進爵東郡公拜太常卿加侍中特進撫軍大將軍左光祿大夫遷司徒浩自序曰國家西平河右敦煌張湛金城宗欽武威段承根三人皆儒者並有雋才見稱於西川每與余論易余以左氏傳卦解之遂相勸為注故因退朝之餘暇而為之解焉

闕氏 駟
集王朗易傳

佚

魏書闕駟字玄陰敦煌人博通經傳三史羣言經目則誦時人謂之宿讀注王朗易傳學者藉以通經撰十三州志行於世沮渠蒙遜重之常侍左右拜秘書考課郎中給文吏三十人典校經籍刊定諸子三千餘卷加奉車都尉牧犍待之彌重拜大行臺遷尚書

劉氏 晖
周易注

佚

魏書劉畊字延明敦煌人隱居酒泉不應州郡之命弟子受業者五百餘人李嵩署為儒林祭酒從事中郎注周易行於世蒙遜平酒泉拜秘書郎築陸沉館於西苑躬往禮焉號玄處先生月致羊酒牧犍尊為國師親自致拜命官屬以下皆北面受業焉世祖平涼州拜樂平王從事諸郎

按釋文引劉氏注豐初九雖旬作鈞

盧氏景裕周易注

佚

魏書盧景裕字仲孺小字白頭范陽涿人也專經為學居拒馬河將一老婢作食妻子不自隨從又避地大寧山居無所業惟在注解世號居士前廢帝初除國子博士甚見親遇待以不臣之禮永熙初以例解天平中還鄉里河間邢摩納與景裕從兄仲禮據鄉作逆逼其同反以應元寶炬齊獻武王命都督賀拔

仁討平之聞景裕經明行著驛馬特徵既而舍之使教諸子在館十日一歸家隨以鼎食先是景裕注周易尚書孝經論語禮記老子其毛詩春秋左氏未訖齊文襄王入相於第開講招延時雋令景裕解所注易景裕義理精微吐發間雅時有問難或相詆呵大聲厲色言至不遜而景裕神采儼然風調如一從容往復無際可尋由是士君子嗟美之普泰初復除國子博士興和中補齊王開府屬卒於晉陽景裕雖不

聚徒教授所注易大行於世

關氏朗易傳

宋志一卷

存

張晞河東先賢傳關朗字子明河東解人有經濟大器或以占筮示人而不求宦達魏太和末并州刺史王軒奏署子明為記室因言於孝文帝帝曰張彝郭祚昔嘗言之朕以卜筮之道不足見爾軒曰此人言

微道深非彝祚所能知也召見帝問老易子明寄言
玄象實陳王道翼日帝謂蚪曰關朗管樂之器豈占
算而已使蚪與子明著成疑筮論數十篇即今孝文
易傳

帝崩明年蚪卒子明遂不仕居臨汾山授門人春秋

老易號關先生學

中興書目關子明易傳一卷唐趙蕤注阮逸詮次刊
正

陳師道曰世傳王氏玄經薛氏傳及關子明易傳李

衛公對問皆阮逸所著逸嘗以草示蘇明允而子瞻言之

晁公武曰關子明易傳四庫書不載李邯鄲始著之目云王通贊易蓋本此也

陳振孫曰關氏易隋唐志皆不錄或云阮逸偽作朱子曰關子明易偽書也

項安世曰唐李鼎祚集解易盡備前世諸儒之說獨無所謂關子明者蓋阮逸偽作也

王應麟曰子明易傳卜百年義第一次以統言易義大衍乾坤策盈虛闔闢理性時變動靜神義終於雜義第十一

吳萊後序曰予始讀文中子中說頗載關朗子明事後得天水趙蕤所注關子易傳十有一篇大槩易上下繫之義疏耳首述其出處本末次分卜百年數別為一篇似皆出之王氏或曰王氏中說本於阮逸關氏易傳肇於戴師愈師愈江東老儒也觀其傳統言

消息盈虛爻象策數之類獨與張彝相問答彝嘗薦之魏孝文而王氏之贊易世傳關氏學也是又豈盡假託而後成書歟夫易之道大矣世之言易者往往不求其道之一卒使其學鑿焉而各不同是故談理致者多溺於空虛守象數者或流於譏緯此豈聖人之意哉蓋天地之初未始有物也聖人特因其自然之理故推而為七八九六之數非苟畫焉將以著其未畫之妙而已後之儒者苟造其理而過為其畫之

求太玄準易者也洞極則又擬玄者也玄之數起於三而洞極之數亦起於三生以配天育以配地資以配人猶易所謂三極之道也故凡三體九變三九二十有七始於萌而實訖於幾正且通焉今其書世見之者亦少中說所載殆未嘗及此然而王氏每尊其學之所自且欲自當達者以為聖人復出王道復行而洙泗禮樂之教復明於斯世毋乃徒托於此而侈言之歟至於考之以典禮稽之以龜策即人事以申

天命懸厯數以示將來關氏之學蓋深於易者也雖
然昔者子張嘗欲知來聖人但言其既往者以告之
是故三代常因其禮之大體而或損益其制非謂王
者有是禮也必過其所卜之數夏以金王得數之生
商以水王周以木王得數之成聖人不敢知也為其
說者尊周漢廢介鄆且以明真主正統之所歸後世
識緯之流耳楚靈欲并天下既不得卜則投龜而詬
天孫皓亦命尚廣卜焉且曰庚子之歲青蓋入洛彼

二君者曾不悟其已之不修而徒欲惟天之快也故
天命吉凶命厯年必以其類應亦可見其概耳元魏
以下爭奪擾攘乃若灼然親覩其事無有少差忒者
張彝之殺亂端見矣曾不告之以避禍者何也其數
也耶銓削選格排沮武人不可謂之數也果其理有
以召之故耶雖然法自此立命由此出聖人人而合
天者也關氏猶拳拳於天人相與之際今之言天者
類曰是莫之為而為者終至於廢人事而不之講嗚

呼關氏之學殆孤矣吾欲削其不合者而著其合者
且書此以質於人焉

胡應麟曰新舊唐書志並無關氏易傳則此書為阮
逸偽撰無疑

李氏鉉周易義例

佚

北史李鉉字寶鼎渤海南皮人從浮陽李周仁受毛
詩尚書章武劉子猛受禮記常山房蚪受周官儀禮

漁陽鮮于靈馥受左氏春秋諸大儒徐遵明受業居門下五年稱高弟撰定孝經論語毛詩三禮義疏及三傳異同周易義例合三十餘卷舉秀才除太學博士文襄徵詣晉陽天保初兼國子博士卒特贈廷尉少卿

佚
權氏會周易注

北齊書權會字正理河間鄚人少受鄭易探賾索隱

妙盡幽微詩書三禮文義該洽魏武定初貢孝廉策
居上第解褐四門博士皇建中轉加中散大夫每為
人占筮小大必中但用爻辭象象以辨吉凶易占之
屬都不經口注易一部行於世

何氏妥周易講疏

隋志十三卷

社史三卷

佚

社史何妥字棲鳳西城人入周仕為太學博士封襄

城縣男文帝受禪除國子博士加通直散騎常侍進
爵為公出為龍州刺史以疾請還詔許之尋為國子
祭酒卒官謚曰肅撰周易講疏三卷孝經義疏二卷
並行于世

王氏通讚易

十卷

佚

杜淹曰文中子續詩書正禮樂修玄經讚易道九年

而六經大就門人自遠而至河南董常太山姚義京
兆杜淹趙郡李靖南陽程元扶風竇威河東薛收中
山賈瓊清河房玄齡鉅鹿魏徵太原溫大雅潁川陳
叔達等咸稱師北面受王佐之道焉

王讜曰文中子隋末隱於白牛谿著王氏六經北面
授學者皆時偉人國初多居佐命之列而王氏六經
卒不傳至元和初劉禹錫撰宣州觀察使王贊碑盛
稱文中子能昭明大道以大中立言游其門者皆天

下俊傑自餘士大夫擬議及史冊未有言文中子者
司馬光補傳曰王通字仲淹河東龍門人受書於東
海李育受詩於會稽夏璵受禮於河東關朗受樂於
北平霍汲受易於族父仲華仁壽三年西入長安獻
太平十二策帝不能用罷歸尋復徵之煬帝即位又
徵之皆稱疾不至專以教授為事乃著禮論二十二
篇樂論二十篇續書百有五十篇續詩三百六十篇
玄經五十篇讚易七十篇謂之王氏六經大業十年

尚書召通蜀郡司戶十一年以著作郎國子博士徵
皆不至十四年病終於家門人謚曰文中子

黃震曰文中子之書以易老並言以釋老與儒為三
教蓋亦六朝流俗耳

王應麟曰王通仲淹讚易七十篇讚易道以申先師
之旨

吳師道曰程子曰王通隱德君子也其言為人傳會
不可謂全書論其粹處非苟揚所及續經之類皆非

其作朱子極論續經之僭而又曰至於假卜筮象論語而強引唐初文武名臣以為弟子是乃福時之所為而非其意二先生所以論王氏者當矣愚嘗觀韓子送王含序謂讀醉鄉記悲其託於昏冥以逃不遇聖人為之歸者以為續蓋通之弟通之學以尊孔氏與韓同科何以無一言及之稱醉鄉之文辭而續經中說乃反不道耶因是而思福郊福時與其門人既傳會成書當時耳目猶近故藏於家而不敢出意數

世之後殆不復有辨之者故劉禹錫李翺始舉其名
二人與韓同時而韓獨未見蓋其傳猶未廣唐季皮
日休司空圖好之而始章其出沒隱顯之故可知矣
然其歲月事實牴牾乖刺終不足以掩後世之耳目
也夫子之於親弟子之於師其所以尊崇褒美之者
固無不極其至然當以誠心不欺為主虛美誣辭豈
所以為愛哉不惟自陷於妄偽而反為父師之累至
有不信其真有是人者郊時門人之罪可勝誅哉因

書之以為世戒

楊時喬曰諸儒謂文中子之易出於關明自言讚易道以申先師之志所讚者亦易之末節爾不知易理故也

陸世儀曰世之論文中子者多不同有極詆之者有極稱之者其言皆不平惟程子謂王通隱德君子當時言語後來為人傳會其粹處殆非苟揚所及若續經之類皆非其所作此為至當不易之論

王氏 又玄周易注

唐志十卷

佚

王氏 凱冲周易注

唐志十卷

佚

侯氏 果易說

佚

王應麟曰朋盍簪簪疾也至侯果始有冠簪之訓晁

景迂云古者禮冠未有簪名

虔氏薛周易音注

佚

胡一桂曰虔薛音注見陸德明引

臨氏孝恭孔子馬頭易卜書

一卷

佚

隋書藝術傳臨孝恭京兆人明天文算術高祖甚親遇之令考定陰陽官至上儀同

何氏六象論以下失名

一篇

佚

玉海何襄城為六象之論曰實象曰假象曰偏象曰圓象曰義象曰用象蕭氏難之不取偏象圓象而立

四象之論

謝氏周易注

七錄八卷

佚

莊氏易義

佚

按莊氏易解正義屢引之其論象曰象斷也
斷定一卦之義所以名為象也凡有一十二
體孔氏稱其理密所詮巽卦謂得正旨劉瓛

分繫辭下為十二章莊氏定為九章正義從之至於釋豫利建侯行師謂建侯即元亨行師即利貞孔氏以屯元亨利貞文後別云利建侯以莊氏為非是

又按正義所引莊氏說每與褚仲都同惟王弼注恒而亨以濟三事褚氏為三事為无咎利貞利有攸往莊氏謂三事无咎一也利二也貞三也意見不同

傅氏周易注

隋志十三卷

啟蒙翼傳
作十四卷

佚

按釋文泰初九引傅氏注彙古偉字美也賁
卦辭引傅氏注賁古班字文章貌萃初六引
傅氏注一渥作渥

盧氏周易注

隋志十卷

佚

范氏周易音

隋志一卷

佚

顏氏周易立成占

隋志三卷

佚

顏氏周易孔子通覆决

隋志三卷

佚

鄭氏易腦經

隋志二卷

佚

晉易髓

八卷今止存
二卷

闕

馮椅曰前志無之中興得於民間題晉人撰

周易雜論

七錄十四卷

以下俱佚

周易問

隋志二十卷

唐志
十卷

擬周易義疏

七錄十三卷

周易文句義

隋志二十卷

按此疑即梁菴書

周易新圖

七錄一卷

周易譜

隋志一卷

周易雜占

隋志十三卷

又十
一卷

易要決

隋志二卷

七錄
三卷

周易新林

隋志一卷

又二
卷

周易林

隋志十卷

七錄三
十三卷

易讚林

隋志二卷

易立成

隋志四卷

神農重卦經

隋志二卷

文王幡音

隋志一卷

易三備

隋志三卷

又一
卷

鄭樵曰上備言天文中備卜筮下備地理

宋志題孔子師徒所述蓋依託也

易占

隋志三卷

易射覆

隋志二卷

又一
卷

易林要決

隋志一卷

周易歷

隋志七卷

周易初學筮要法

七錄一卷

易歷決疑

隋志二卷

周易卦林

隋志一卷

易新圖序

隋志一卷

易通統圖

隋志二卷

又一
卷

易統卦驗玄圖

隋志一卷

易八卦斗內圖

隋志二卷

又二
卷

周易八卦五行圖

七錄一卷

周易斗中八卦絕命圖

七錄一卷

周易斗中八卦推游年圖

七錄一卷

周易髓腦

隋志二卷

周易分野星圖

隋志一卷



經義考卷十三



總校官庶吉士臣侍朝
校對官檢討臣王鍾健
謄錄監生臣孫起鵬

欽定四庫全書會要

史部

經義考卷十五

四

臣沈初詳校

詳校官員外郎臣潘紹觀



欽定四庫全書
畧要卷九千七百四十三

史部

經義考卷十四

翰林院檢討朱彞尊撰

十三

魏氏周易義徵

六卷

佚

舊唐書魏徵字玄成鉅鹿曲城人李密召典書記竇

建德署為起居舍人隱太子引直洗馬太宗引為詹事主簿及踐阼拜諫議大夫遷秘書監代王珪為侍中加左光祿大夫封鄭國公特進知門下事拜太子太師薨贈司空相州都督謚文貞

按是書新舊唐志均不載蓋即史證口訣義惟因荆南田鷁藏書目誤云魏鄭公撰而紹興中秘書省續編到四庫闕書目亦載之昭德晁氏郡齋讀書志已糾其謬矣今仍著於

錄慮洽聞者擿其闕漏也

孔氏穎達等周易正義

舊唐志十四卷

中興書目同新
唐志作十六卷

存

新唐書傳孔穎達字仲達冀州衡水人太宗平洛授文學館學士遷國子博士貞觀初封曲阜縣男轉給事中除國子司業歲餘以太子右庶子兼司業加散騎常侍爵為子父之拜祭酒後致仕卒陪葬昭陵贈

太常卿謐曰憲初穎達與顏師古司馬才章王恭王談受詔撰五經義訓凡百餘篇號義贊詔改為正義云雖包貫異家為詳博然其中不能無謬冗博士馬嘉運校正其失至相譏詆有詔更令裁定功未就永徽二年詔中書門下與國子三館博士弘文館學士考正之於是尚書左僕射于志寧右僕射張行成侍中高季輔就加增損書始布下

新唐書志國子祭酒孔穎達顏師古司馬才章王恭

太學博士馬嘉運太學助教趙乾叶王談于志寧等
奉詔撰四門博士蘇德融趙弘智覆審

崇文總目唐太尉長孫無忌與諸儒判定宋朝端拱
初國子祭酒孔維等奉詔是正其言主申王學云

穎達序曰夫易者象也爻者效也聖人有以仰觀俯
察象天地而育羣品雲行雨施效四時以生萬物若
用之以順則兩儀序而百物和若行之以逆則六位
傾而五行亂故王者動必則天地之道不使一物失

其性行必協陰陽之宜不使一物受其害故能彌綸
宇宙酬酢神明宗社所以無窮風聲所以不朽非夫
道極玄妙孰能與於此乎斯乃乾坤之大造生靈之
所益也若夫龍出於河則八卦宣其象麟傷於澤則
十翼彰其用業資九聖時歷三古及秦亡金鏡未墜
斯文漢理珠囊重興儒雅其傳易者西都則有丁孟
京田東都則有荀劉馬鄭大體更相祖述非有絕倫
惟魏世王輔嗣之注獨冠古今所以江左諸儒並傳

其學河北學者罕能及之江南義疏十有餘家皆辭尚虛玄義多浮誕原夫易理難窮雖復玄之又玄至於垂範作則便是有而教有若論住內住外之空就能就所之說斯乃義涉於釋氏非為教於孔門也既背其本又違於注至若復卦云七日來復並解云七日當為七月謂陽氣從五月建午而消至十一月建子始復所歷七辰故云七月今按輔嗣注云陽氣始剝盡至來復時凡七日則是陽氣剝盡之後凡經七

日始復但陽氣雖建午始消至建戌之月陽氣猶在
何得稱七月來復故鄭康成引易緯之說建成之月
以陽氣既盡建亥之月純陰用事至建子之月陽氣
始生隔此純陰一卦卦主六日七分舉其成數言之
而云七日來復仲尼之緯分明輔嗣之注若此康成
之說遺跡可尋輔嗣注之於前諸儒背之於後考其
義理其可通乎又蠱卦云先甲三日後甲三日輔嗣
注云甲者創制之令又若漢世之時甲令乙令也輔

嗣又云令洽乃誅故後之三日又巽卦云先庚三日後庚三日輔嗣注云申命令謂之庚輔嗣又云甲庚皆申命之謂也諸儒同於鄭氏之說以為甲者宣令之日先之三日而用辛也欲取改新之義後之三日而用丁也取其丁寧之義王氏注意本不如此而又不顧其注妄作異端今既奉敕刪定考察其事必以仲尼為宗義理可詮先以輔嗣為本去其華而取其實欲使信而有徵其文簡其理約寡而制衆變而能

通仍恐鄙才短見意未周盡謹與朝散大夫行太學
博士臣馬嘉運守太學助教臣趙乾叶等對共叅議
詳其可否至十六年又奉勅與前修疏人及給事郎
守四門博士上騎都尉臣蘇德融等對勅使趙弘智
覆更詳審為之正義凡十有四卷庶望上裨聖道下
益將來故序其大畧附之卷首爾

歐陽修曰于志寧撰孔穎達碑質於唐書列傳字有
不同傳云字仲達碑云字沖遠可以正傳之謬

張唐英曰穎達周易正義發明三聖之旨通貫萬化
之蘊其亦深於易乎

陳振孫曰序云十四卷館閣書目亦云今本止十三
卷按五經正義本唐貞觀中穎達與顏師古等受詔
撰五經義贊後改正義博士馬嘉運駁正其失永徽
二年中書門下于志寧等考訂增損書始布下其實
非一手一足之力世但稱孔疏耳其說專釋一家注
文為正

程珌曰自王弼以後江南義疏祖尚虛無至唐孔穎達辨析音義頗為當時所宗然至於聖賢用心斯道大綱固未之深及也

黃震曰陸德明顏師古孔穎達訓詁之學用意良苦如漢馬鄭之流矣

胡一桂曰易正義大概因王弼韓康伯注為之解釋敷演於義理象數之學未能卓然有所見也
王贊曰孔穎達撰定諸經之疏號曰正義自是以來

著為定論凡不本於正義者謂之異端誠學者之宗師百世之所取信也

按葉氏菉竹堂書目有長孫無忌周易要義五冊凡十八卷無錫秦對巖前輩今有其書大畧與正義相同考正義即係無忌刊定非別一書也

周易玄談

六卷

佚

董真卿曰穎達與顏師古等同撰周易正義又撰玄

談六卷

按紹興書目有之

陸氏德明周易文句義疏

唐志二十四卷

本傳二
十卷

佚

周易大義

唐志作文
外大義

隋志二卷

佚

舊唐書陸德明蘇州吳人太宗徵為秦府文學館學士貞觀初拜國子博士封英縣男

新唐書陸元朗字德明以字行隋大業初為太學博士世稱左氏有徐文遠禮有褚徽詩有魯達易有陸德明皆一時冠

周易釋文

唐志一卷

存

陳振孫曰多援漢魏以前諸家說蓋唐初諸書皆在
也卦首注某宮某世用京房說

王氏玄度周易注

舊唐志十卷

佚

冊府元龜王玄度為校書郎貞觀十六年十月上其

所注尚書毛詩周易并義次三卷與舊解尤別者一百九十多條付學官詳其可否諸儒皆因習先師譏其穿鑿玄度隨方應答竟不肯屈太宗欲廣見聞並納之秘府

任氏希古周易注

唐志十卷

佚

計敏夫曰任希古字敬臣棣州人舉孝廉虞世南器

其人為弘文閣學士終太子舍人

薛氏仁貴周易新注本義

唐志十四卷

佚

舊唐書仁貴絳州龍門人右領軍衛將軍檢校代州
都督贈左驍衛將軍

歐陽棐曰苗仁客撰薛仁貴碑云薛禮字仁貴河東

汾陰人

李氏淳風周易玄義

通志三卷

佚

周易薪冥軌

通志一卷

未見

舊唐書李淳風岐州雍人博涉羣書尤明天文厯算
陰陽之學貞觀初直太史局除太常博士尋轉太史

丞遷太史令

按是書一齋書目有之

袁氏天綱易鏡玄要

通志一卷

佚

舊唐書袁天綱益州成都人隋大業中為資官令武
德初蜀道使詹俊赤牒受火井令

陰氏弘道周易新論傳疏

弘或作洪

唐志十卷

佚

新唐書志顥子臨渙令

崇文總目洪道世其父顥之業雜采子夏孟喜等十八家之說參訂其長合七十二篇於易有助云

按紹興闕書目有之

王氏勃周易發揮

唐志五卷

佚

楊炯曰君所著周易窮於晉卦

舊唐書勃字子安絳州龍門人年未及冠應幽素舉及第上元二年往交趾省父渡南海墮水而卒勃好著書撰周易發揮五卷亡後並多遺失

新唐書勃嘗讀易夜夢若有告者曰易有太極子勉思之寤而作易發揮數篇至晉卦會病止

崔氏 懇 周易探玄

佚

李鼎祚曰崔氏探亥病諸先達謂大衍說及乎自料未免

小疵

按崔愬時代莫考李鼎祚集解引用最多稱為新義中援孔疏其為唐人無疑矣

趙氏
魏注關子明易傳

一卷

存

蕤自序曰蕤非聖人五十安知天命然從事於易雖亂離中未嘗釋卷蓋天命深微莫研其極而予明之傳蕤粗通之然恨此書亡篇過半今所得者無能詮次但隨文義解注庶學者觸類而長當自知之爾

孫光憲曰蕤梓州鹽亭人博學韜鈴長於經世夫婦俱有隱操不應辟召

祝穆曰蕤篤學不仕與李白善嘗著書號長短經

曹學佺曰蕤梓州人李白嘗師事之所謂趙徵君也

張氏 弼周易王道小疏

宋志五卷

紹興書
目十卷

佚

按世所傳卜子夏易晁景迂謂是張弧偽作而弧自有王道小疏惜其書不傳無從辨其辭旨之異同也弧未詳何時人所著素履子三卷題曰唐將仕郎試大理寺評事考子夏易傳開元中即詔儒官詳定而資州李氏集

解屢引之意其為唐初人乎

王氏周易要削

宋志三卷

佚

胡一桂曰自題丘園子王隱自序云總康成輔嗣輩
所說曰要削者言撮其要也稱天寶庚寅知為唐人

李氏周易集解

新唐書作
集注周易

新唐志十七卷

中興書目
通考十卷

存

中興書目集解十卷唐著作郎李鼎祚集子夏孟喜
京房馬融荀爽鄭康成劉表何晏宋衷虞翻陸續干
寶王肅王輔嗣姚信王廙張璠向秀王凱冲侯果蜀
才翟玄韓康伯劉瓔何妥崔愬沈麟士盧氏崔觀孔
穎達等凡三十餘家附以九家易乾鑿度凡十七篇
其所取苟虞之說為多

中興藝文志李鼎祚易宗鄭康成排王弼

鼎祚自序曰原夫權輿三教鈴鍵九流實開國承家
修身之正術也自卜商入室親授微言傳注百家綿
歷千古雖競有穿鑿猶未測淵深惟王鄭相沿頗行
於代鄭則多參天象王乃全釋人事且易之為道宜
偏滯於天人者哉致使後學之徒紛然淆亂各修局
見莫辨源流天象遠而難尋人事近而易習則折楊
黃華噓然而笑方以類聚其在茲乎臣少慕玄風游
心墳籍歷觀炎漢迄今巨唐搜羣賢之遺言議三聖

之幽曠集虞翻荀爽三十餘家刊輔嗣之野文補康
成之逸象各列名義共契玄宗先儒有所未詳然後
輒加添削每至章句僉列發揮俾童蒙之流一覽而
悟達觀之士得意忘言當仁既不讓於師論道豈慙
於前哲至如卦爻象象理涉重玄經注文言書之不
盡別撰索隱錯綜根萌音義兩存詳之明矣其王氏
畧例得失相參采葑采菲無以下體仍附經末式廣
未聞凡成一十卷以貽同好冀將來君子無所疑焉

計用章後序曰易之為書無所不通大焉天地之變
細之鱗介之動數宜象索惟神之測聖師歿七十弟
子喪後出之師各專其習故異同派焉晉魏之際傳
者尤衆獨王氏為異摘去拘滯特論人事蓋得聖人
所以為易之意是以歷代貴之列諸學官學者誦焉
諸儒章句遂廢不著非好古博雅人間鮮有傳者慶
厯壬午相府策賢良六題一出此書素未嘗見賢良
多下者是冬予放謫北歸復官漢東至淮安太守平

陽公館焉公先德學士蜀之儒宗名為博古因間以
請遂出先學士所藏李氏易本俾予與其子彥孚習
焉其書會數十章句取其合者著之其解卦異者家
世變正時來旁通互採頗為煩悉若何范之為春秋
者其所取荀慈明虞仲翔為多而斥王氏李氏之志
也彥孚既授卒業且欲中都官文與先學士之意因
緘別本屬所親眉陽孫景初募工刊刻以廣傳布噫
此書意例雖異其精者連環錯綜者有理證似非一

人之學所能舉意仲尼之後師師相承以及翻爽豈易之道天地人鬼神萬化巨細無不貫後之學者不能兼明直順所聞言之邪古之能事亡逸者多矣後或有惜之者况此書聖賢之遺旨所存乎他日有沉深志古得之怡然以自廣斯亦平陽氏之世德也慶

歷甲申七月

晁公武曰鼎祚集解皆避唐諱又取序卦各冠雜卦之首其序云刊輔嗣之野文補康成之逸象蓋宗鄭

學者也隋書經籍志所錄易類六十九部今所有五
部而已關朗不載於目乾鑿度自是緯書焦贊易林
又屬卜筮子夏書或云張弧偽為然則隋志所錄舍
王弼書皆未得見也獨鼎祚所集諸家之說時可見
其大旨唐錄稱鼎祚書十七卷今所有止十卷蓋亦
失其七惜哉

李燾曰鼎祚自序止云十卷無亡失也

陳振孫曰隋唐以前易家諸書逸不傳者賴此書猶

見其一二而所取於荀爽者尤多九家者漢淮南王所聘明易者九人荀爽嘗為之集解陸氏釋文所載說卦逸象本於九家易

朱睦樞序曰唐藝文志稱李鼎祚集注周易十七卷據鼎祚自序云十卷而首尾俱全初無亡失不知唐史何所據而云十七卷也崇文總目及邯鄲圖書志亦稱七篇逸蓋承唐史之誤耳鼎祚解經多避唐諱又取序卦冠於各卦之首所引有子夏孟喜焦贊京

房馬融荀爽鄭玄劉表何晏宋衷虞翻陸續干寶王肅王弼姚信王廙張璠向秀王凱冲侯果蜀才翟玄韓康伯劉徽何妥崔愬沈麟士盧氏崔覲伏曼容孔穎達凡三十二家又引九家易乾鑿度諸說義有未詳鼎祚乃加增削予嘗綜其義例蓋宗鄭學者也自商瞿之後注易者百家而鄭氏玄王氏弼為最顯鄭之學主象數王之學主名理漢晉以來二氏學並立至劉宋初顏延之為祭酒黜鄭置王時陸澄王濟輩

皆以為不可自是汾陽諸儒多主於鄭江左及青齊
多主於王唐興孔穎達受詔撰定五經正義於易獨
取王傳而鄭學遂廢先代專門之業亦復不傳可勝
嘆哉夫易有聖人之道四焉世之言理義之學者以
其辭耳象變與占其可闕乎昔吳季札之魯觀樂見
易象喜曰周禮盡在魯矣是故象者易之源也象成
而有辭辭著而後有變變見而後有占若乃穎尚文
辭不復推原大傳天人之道歧而為二可乎康成去

古未遠其所纂述必有所本鼎祚恐其失墜以廣其說均之為有裨於易者也是編刻自宋季人間希有存者頃歲予得之李中麓氏復用校梓以傳欲使聖人之道不致偏滯而自漢迄唐三十家之言亦不至埃滅弗聞也鼎祚資州人仕唐為秘閣學士以經術稱於時及閱唐列傳與蜀志俱不見其人豈遺之耶抑別有所載耶因附論著於此以俟博雅者考焉潘恭定公序曰此唐李氏鼎祚所輯易解刻之者我

明宗室西亭氏也六經之道大矣而易之為原自古
庖犧氏之王天下始畫八卦重之為六十四周文王
作卦辭公旦作文辭孔子繫之以十翼所以闡陰陽
之秘發天地之房者斯其至哉語有之乾坤毀則無
以見易言易與天地相始終也自卜商以後傳注百
家惟王鄭為衆所宗頗行於代李氏謂鄭則多參天
象王乃全釋人事易之為道豈偏滯於天人哉於是
採摭遺言歷漢迄唐集虞翻荀爽三十餘家刊輔嗣

之野文補康成之逸象其用意勤矣夫二氣運行彰
往察來莫曠於天道而八象備之消息盈虛其數不
可畧也貞悔相因雜物撰德莫辨於人事而六位窮
之乘承失得其理不可遺也故曰易也者天人之間
者也孰或合之而孰或離之李之宗鄭斤王過矣迨
及有宋儒道彰明若正叔程氏之易傳晦庵朱子之
本義皆淵源王學而二書沛然大行於時近世因之
立於學官凡師之所以教弟子所肄習者獨宗朱子

是故童幼而嶺一藝白首而或未能言蓋安於所習
歿所不見卒以自蔽此學者之通患也儒先有言隋
唐以前易家諸書逸不復傳賴李氏此書猶見其一
二然則是編何可廢哉西亭氏者負陳思之軼才慕
河間之大雅詞翰踔絕躋古作者之塗邇年好易潛
心韋編遂以所得宋本摹善工刻之以廣傳布詎不
謂知本者耶今夫岷崐之水其發源也洋洋無垠演
而為河流匯而為滄海至於海而水之觀盡矣羲文

周孔之易辟則岷崐之源也李氏之集解辟則河之衆流也程朱之傳義辟則海之會歸也是故由集解而溯四聖之微言則其端倪可測矣由集解而徵程朱之著述則其脉絡益明矣傳云先王之祭川先河而後海或原或委之謂務本然則是編之刻其先河之義也夫刻既完授余讀之且屬余序余遂詮次其略俾後覽者有所考焉

按資州有李鼎祚讀書臺見袁桷清容居士

集易集解所采中興書目止列三十家此外尚有伏曼容姚規朱仰之及彭城蔡景君說

易髓

宋志三卷

佚

郭氏京易舉正

宋志三卷

存

崇文總目唐蘇州司戶叅軍郭京撰京世授五經得
王輔嗣韓康伯手寫易經比世所行或頗差駁故舉
正其訛而著於篇

中興書目京自序言得王輔嗣韓康伯手寫定本比
校今所習者或將經入注用注作經小象中間以下
句反居其上爻辭注內移後義却處於前兼有脫遺
二字顛倒謬誤者並依定本舉正其訛總一百三十
五處二百七十三字

晁公武曰京自稱家藏王韓手札周易本及石經校正一百三十五處二百七十三字蓋以繇彖相正有闕漏處可推而知託云得韓王手札及石經耳如渙之繇利涉大川下有利貞字而彖辭無之則增入漸之繇女歸吉下無也字而彖辭有之則削去他如此類洪邁曰易舉正三卷云曾得王輔嗣韓康伯手寫注定傳授真本比較今世流行本及國學鄉貢舉人等本舉正其訛凡一百三節今畧取其明白者二十處

載於此坤初六履霜堅冰至象曰履霜陰始凝也馴致其道致堅冰也今本於象文霜字下誤增堅冰二字屯六三象曰即鹿無虞何以從禽也今本脫何字師六五田有禽利執之無咎元本之字行書向下引脚稍類言字轉寫相仍故誤作言觀注義亦全不作言字釋也比九五象曰失前禽舍逆取順也今本誤倒其句賁亨不利有攸往今本不字誤作小字剛柔交錯天文也文明以止人文也注云剛柔交錯而成

文焉天之文也今本脫剛柔爻錯一句坎卦習坎上
脫坎字姤九四包失魚注云有其魚故失之也今本
誤作无魚蹇九三往蹇來正今本作來反困初六象
曰入于幽谷不明也今本谷字下多幽字鼎彖聖人
亨以亨上帝以養聖賢注云聖人用之上以亨上帝
而下以養聖賢今本正文多而大亨二字故注文亦
誤增大亨二字震象曰不喪匕鬯可以守宗廟社
稷以為祭主也今本脫不喪匕鬯一句漸象曰君子

以居賢德害風俗注曰賢德以止巽則居風俗以止巽乃害今本正文脫風字豐九四象遇其夷主吉志行也今文脫志字中孚象豚魚吉信及也今本及字下多豚魚二字小過彖柔得中是以可小事也今本脫可字而事字下誤增吉字六五象曰密雲不雨已止也注陽已止下故也今本正文作已上故注亦誤作陽已上故止也既濟彖曰既濟亨小小者亨也今本脫一小字繫辭二多譽四多懼注云懼近也今本

誤以近也字為正文而注中又脫懼字雜卦蒙雜而著今本雜誤作雜字予頃於福州道藏中見此書而傳之及在後省見晁公武所進易解多引用之世罕有其書也

李燾曰京此書使經傳不相混亂殘闕復為真全頗有益於學者然能研諸侯之慮行侯之字成言乎良當作誠若此等京蓋未知豈王韓舊本固不免訛舛耶京開元後人故所為書不得著錄本末亦未詳要

可惜云

趙汝楨曰郭京作舉正自以為得王弼韓康伯手寫
注定傳授真本於今易有所損益凡一百三條坤初
六象曰履霜堅冰陰始凝也京本無堅冰二字按此
乃舉爻辭以通文義謂言履霜而遽及冰者霜為陰
凝之極故言始凝以明堅冰之漸儻去堅冰但云始
凝則始字無因而發或者京因魏許芝之對而云爾
卜史一時之言可據以改經耶比九五象曰舍逆取

順失前禽也京本失前禽在舍逆取順之上意彼以
釋辭在上爻辭在下乃倒顛之案小象類此頗多恒
九四曰田无禽象曰久非其位安得禽也解初六曰
无咎象曰剛柔之際義无咎也旅九三曰喪其僕僕
象曰以旅與下其義喪也凡是與此正同此聖人互
文明理之妙庸可臆改夫易全書也後人猶挾王韓
之名以更古文他經何望焉

王應麟曰旅初六斯其所取灾王輔嗣注云為斯賤

之後郭京謂斯合作斲愚按後漢左雄傳職斯祿薄
注云斯賤也不必改斲字

黃宗炎曰郭氏易舉正文其義較長於今本

經義考卷十四